

Herr Jesu/der du hast gesandt/ Dein Aposteln in alle Land/  
Zu leren vns den willen dein / Hilff das wir frome Schüler sein.

## Die Historia von der Auffart Christi.

Nach vorgehender Methodien vnd Composition.

**A**ls vierzig Tag nach Ostern warn/ Vnd Christus wolt gen  
Himmel fahrn/ Bschied er sein Jünger auff ein Berg / Vol-  
lendt hat er sein Ampt vnd Werck.

Er sprach: All ding erfüllet sind/ Die man von mir geschrie-  
ben findt/ In Propheten vnd Moses Lahr / Die Schrift Er in  
ausleget klar.

Also/sprach Er/hats müssen sein / Das Christus liedt des  
Todtes pein/ Vnd must wider vom Tod auffstehn/ Durch Creutz  
vnd todt in sein Reich gehn.

Im Himmel ist mir all Gewalt / Geben auff Erden gleicher  
gestalt/ Des solt jr meine Zeugen sein/ Solchs wird mein Geist  
euch leren sein.

Geht hin/predigt in meinem Namen/ Vergebung der Sünd je-  
derman/ Teufft vnd lehrt alle Völcker gleich / Vnd samlet mir ein  
ewigs Reich.

Wer gleubet vnd sich teuffen leht / Derselb die Seligkeit em-  
pfeht/ Wer aber nicht gleubt/ wird verdampt/ Macht solchs in al-  
ler Welt bekandt.

Alles was jr von mir habt ghört/ Mit fleis dasselb sie hal-  
ten lehrt. Ich wil bey euch sein bisz ans End / Wartet bisz ich mein  
Geist euch send.